

QVÆSTIO MEDICA

Quodlibetariis disputationibus mane discutienda in Scholis
Medicorum, die Jovis 13. Februarij

M. CAROLO LE LONG, Doctore Medico, Præfide.

Sunt-ne optima Medicamenta que magis arcana?

I.

MEDICAMENTVM seu ex plantis, seu ex Animalibus, seu ex Metallis
quærat, eo constat materiæ, qualitatumve modulo, qui à veneni & ali-
menti indole pariter remotus, corporis valetudinem efficere potest ex im-
probâ meliorem. Non una videtur ejus conditio, nec una laus, ausim dicere nec
una fraus. Aliud quod multiplici etiam virtute præditum nascitur, simplex; aliud
compositum appellatur, quod plurimâ concrevit rerum confusione similium,
dissimiliumve, quâ simplicium, quâ compositarum. Illud naturæ, hoc homi-
num opus, atque utinam non mangonium. Vtrumque interno aut externo corpori
præparatur. Simplex quidem ablutione, infusione, decoctione, unctione, similive
modo simplicitatis componitur: compositum vero operosius adhuc ex aliis adorna-
tur, ut eorum permixtione infringi possit præcipui cujusdam medicamenti vis,
imbecillitas acui, pravitas emendari, insuavitas conditi, motus componi, ac de-
nique virtus diu conservari. Neque aliunde major medicamentorum luxuries, aut
arcanorum farrago. Quodcumque autem illud sit quod à calore nostro excitatum
valetudinem mutat, specie, æque ac potestate, colore, figurâ, vel mole diver-
sum; id ad unam tantummodo alterandi, aut vacuandi Provinciam spectabit, quam
in aliâ, atque aliâ corporis regione infirmius, debiliusve geret, prout est suo inge-
nio comparatum. Tum alterantium genus omne, & variis quidem qualitatibus af-
ficit, & incidit, incrassat, attenuat densatque: neque modo partem aliquam in-
tâs, vel in cute seorsim disponit, sed totum simul corpus, ut medendo conva-
lescat. Tum præterea vacuatio multiplex Chirurgiæ, pharmaciæve subjicitur;
hæcque aut promiscua est, nec unius humoris, nec ab uno medicamento deductio
per vesicam, os, nares, corporisve poros, aut singularis quædam seu vomitu, seu
dejectione purgatio ad excernendam eam corporis impuritatem, quæ in visceribus
peccat & redundat. Si tamen de communibus Remediis non communiter sentias;
Caveto ne hoc ad bilem cum peculiari tesserâ mittatur, illud ad pituitam; ne hoc
ad hepar, illud ad cerebrum. Iterum caveto ne hoc urinæ, sputo, puri; illud Apo-
plexiæ, nephritidi, pleuritidi singulariter destinetur. Attamen medicamenta quan-
tum olim à junioribus Methodicis, tantum adhuc à facilitate Dogmaticorum ha-
bent vanitati. Quamobrem definimus mirari cur tam frequens rumor spargitur in
vulgus de Remediis omnium inertissimis, quæ nullo naturæ ac virtutis merito
laudabilia, sed ob id unum famosa in ore multorum percrebrescunt, quod familia-
ria sordido cuidam auctori, ceteros velut arcana latere videantur.

QUI popularem auram secretorum mendacio consecretantur : ii plurimum impudentiæ sibi assumunt, nihil aut parum admodum Medicinæ. Hæc quovis ægris succursura est, amplâ materiæ Medicæ cognitione gloriatur, sed multo magis prudenti ejusdem usu. Natura quidem morbi, causæ morbificæ, symptomatumque morbo assidentium per se commonstrat, quodnam ex tot Remediis eligendum sit. Illorum deinde vehementia, tempus & locus definiunt optimam electi administrationem. In carnificinam incidit quisquis hoc indicationum lumen orbus errat, sine medendi methodo omnium dignissimo arcano, singulis utili, paucis gratiofo. Cujus ductu medicus rectâ incedit inter morbi sævitiam, ut ei resistat; & ægrorum vires, ut eis prospiciat. Quid si utrumque hunc artis scopum nunquam videt, qui aliquâ forsan confidit Radice sibi soli cognitâ, aliquo semine, succo, pulvere, potu, quem nulli non morbo, & nullo non morbi tempore tam occulte, quam imprudenter inculcat. Quâ vero fronte medicafter ullam rem non haberet communem cum Medicis naturæ ministris & exploratoribus? Simplex est atque eorum animis facile occurrit. Composita est : atque autorem sæpius, quam cæteros fallit. Nova est? Nequedum satis innotuit ad utilitatis gloriam. Vetus est? Iamque diuturnâ contempione obsolevit. Nonnulli igitur tacitum quid servent ceu mysterium. Hoc saltem audiet velut prophanum, iners, vitiosum. Vnde incredibilis fiat ignorantie accessio ad istorum mystagogorum impudentiam vix dissimilium præconibus, qui fugitivi mancipii formam & notas ex alienâ voluntate publicant, quas ipsi nesciunt : non secus ac tot ignari ex aliorum credulitate celebrant varium rerum miracula, quæ nusquam comparuerunt. Tantumque mendacii turpiori adhuc avaritiæ vitio cumulant, parum solliciti de hominum salute, dum popello verba dent, & suæ fortunæ consulant. Ideoque fallax istud Arcanorum signum non insulse quis ab arcâ nuncupari dicat : ex quâ unus formulæ ejusdam calceus educitur omni morborum pedi inducendus ; vel in quam ab istis ærusicatoribus confertur quicquid pecuniæ, ex multitudinis stultitiâ corraferunt.

III.

QUEM ADMODUM Medicina homines non fortunâ, neque personis æstimat, sed eâ tantummodo, quâ Medici opem implorant valetudinis infirmitate. Ita etiam Remediorum vires neque ullo metitur secreto, neque lucro, sed suâ dumtaxat ad sanitatis commodum efficacitate. Hanc in purgantibus sola experientia, in alterantibus sapor etiam declarat. Cum alia vel alia res degustata linguam & palatum statim accendit vel refrigerat ; astringit vel laxat, pungit vel demulcet, deterget vel corrumpit. Magno ubique argumento id ipsum in interno corpore effici, quod in ore. At vero in odoris colorisque suavitate, materiæ sumptu, præparationisve ritu ; characterum similitudine cum partibus corporis, humoribus, morbis ; nec non & in certâ naturæ convenientiâ cum planetis tanta est fertilitas arcanorum, quanta sterilitas medicamentorum. Quæ potius multiplici experimento, nec fallaci, acri demum judicio, licet difficili debent comprobari. Sicque artis ratio distinguit id, quod alterius interventu agit ab eo, quod sponte & per se. Atque in uno homine, nec unâ periclitatione, nec ullâ mixturâ adulteratum cognoscit quicquid homini certissime medetur. Tum præcipue ubi datâ medendi occasione, neque simplex medicamentum cum affectu composito pugnat, neque compositum cum simplici. Sin minus alterutrius simplicitas vel compositio judicem medicamenti non leviter detinebit iniquâ, aut saltem incertâ eventus exstimatione suspensum. Harum observatione legum firmissima stat experientia, ceu rerum, quæ eodem modo & sæpiissime visæ sunt tam

utilis cognitio, quàm iis omnibus denegata, qui in arcanis se jactant. Vnde facilitum sit eos semper & turpiter falli, ac fallere. Egregiam enim laudem in cane, in pullo aquam experiri, quæ vulneratum hominem subito invulneratum præstabit! Aliquo decocto morientem non occidisse, quem mutabilis inclementia morbi fugiebat! Uno propriæ urinæ calice ægrum à quartanâ liberasse, cujus altissimas radices avulserant gratæ vices veris & favoni, præsidiorum & patientiæ! Verum quoties hæc præclara medendi ratio tam feliciter successit? Semel fortè aut iterum. Quoties deinde eorum, qui idem beneficium sperabant vota frustrata est? Centies. Atque inde non ne satis liquet hoc ægris pene inutile esse medicamentum, quod paucorum manu, & rarò tractatur; istud denique utilissimum, quod plurimi sapissime experti quovis modo probaverunt sine noxâ efficacissimum.

I V.

ALIIQUID invenisse, quod cuiquam profuerit ad convalescendum, id unius sæpe hominis, ac fortunæ fuit: illud ad communem salutem accommodasse, id ferè nunquam unius hominis, ne regionis quidem aut ætatis erit. Recens hæc nostra hoc te nuperrimè docuit de stibio. Græcorum antiquitas idem monuit de Rheo, utroque remedio ad purgandum veteribus ignoro. Tam incerta nutat medicamentorum fors, ut etiam vulgata, nedum arcana, diu luctentur cum invidiâ temporum & experimentorum, ante certam laudis victoriam. Hanc eis una tribuit recta medendi ratio peritissimorum consuetudine, usque tradita; non stoliditas plebeculæ, non garrulitas Agyrtarum, non autoritas medicorum quantavis veterum. Quid enim? Temeritatis ne reus citaretur, qui (salvâ Coi. Cap. padocisque senis reverentiâ) suum aliquando Græcis in remediorum judicio & apparatu soporem exprobraret Arabum vetero fere parem. Ne quid tamen odiosius dicam de tantâ simplicium compositorumve futilitate utrisque communi. Quondam scarificationes, hirudines non laude modo contulerunt, sed adæquaverunt cum venæ sectione, ignavum præsidium cum generosissimo, vicarium cum principe, præterquam quod purgandi virtutem dederunt Mercuriali, filiculæ, centauro, fumaris, thymo, origano, tamarindis, myrobalanis, cæterisque seu lenientibus, seu lubricantibus, seu astringentibus aut detergentibus medicamentis olim laudatis ad corpus exonerandum suo stercore dicam, non humore. Hæc itaque tantùm distant à purgantibus, quantum cacatio à purgatione, nostris quam Græcorum temporibus longè feliciori. Procul enim veratrum & peplium quam abiære, rariùs proponitur colocynthis, scammonia. Tum frequentiori sennæ, cassiæ, manna, similiumque delectum haud dubia plurimorum experientia posteritati commendavit. Adeo ut nequidem Esculapius ipse sua arcana auderet comparare cum tam usitatis remediis; quorum virtus nullâ potuit locorum, temporum, ægrotum, morborum, contentionumque varietate deterere nec præcipiti medendi occasione minui vel auferri; quin ad nos maximâ cum laude perveniret. Nimirum ut sapientia, ita etiam Medicina, quæ sapientiæ soror est, à multiplici pendet rerum periculo; cui hac nostrâ ætate debetur, quod artis conditores nostra nunc nobis invident medicamenta suis benigniora, nec imbecilliora, immo præstantiora.

V.

HOMINEM ex libro, non ex arte regit, qui quascumque ei quærît remedium formularum sæpe à morbi, sæpius ab ægri naturâ alienas. Vis alterari universum Corpus? meminèris uno caloris siccitatisque excessu ut plurimum laborare, maximamque ei opem feret temperatum in medicamento alimentum, in alimento medicamentum. Naturam, quæ ab omni qualitatim immoderatione abhorret, similis conservatione pariter tuetur, oppugnatque morbum tacitâ con-

trarii depulsiōe. Hoc promptum ad omnem indicationem auxilium suppeditant Animalium, herbarumque partes, & succi suā utilitate tanto celebriores, quanto utendi assiduitate notiores. Equidem mihi neganti aliquid esse medendo, quod alendo non est; Aqua, Aer, totuplexque reclamaret materia, quæ licet è fodi- nis eruatur, externis morbis quam internis longè melior, non ideo statim ex- cranda erit, quasi inutilis, aut noxia, quia Chymicorum manibus fuerit attrita. Esto sanè maiorem à medico requirat agendi prudentiam. Quid tum inde? Quantæ enim molis est humanæ saluti præesse; tanti interest nullum aspernari remedium, quocumque ab homine, quocumque ex orbe veniat ad nos per salutare ægrorum curationes. Nullum deinde solo antiquitatis studio retineri velim, quæ plurima reli- quit facile rejicienda. Nullum alicujus novitatis fastidio rejici, quæ plurima tulit diu retinenda. Verùm si rectè sapimus tot roborantium fabulæ conticescent, nugæ evanescent, ut locum patumper cedant quibusdam Hermeticorum inventis ad me- dendum, quorum tamen principia omitti possint ad differendum, Quorsum enim tot spiritus, sales? quorsum corpuscula Acida, Alkali? quorsum tot operationum exem- pla, aut in corpore humano imitamenta, ad humorum motus in sanis, ægrisque expli- candos, comprimendos, excitandos? nisi ut innovetur quoddam comparationis ar- gumentum ad veritatis fidem nimis infirmum. In remediis autem verus philoso- phia satis est, & quotidiana experientia. Vtraque semper damnabit universalis cujusdam Medicinæ mysterium immo hoc vanitatis idolum ridebit, quod unum Chymicorum principes cuilibet fere interno morbo promittebant, velut secretissi- mam ex auro potabili, aut balsamo panacæam; ut ii inertius peccarent in splendida quavis Personâ, qui olim nihil non habuerunt, totiesque adhuc mustitant velut ar- canum; cum tamen de medicamentis idem sit verissimum, quod de amicis, his maximè assuescendum esse, familiariterque utendum, quorum fides sapissime probata, in adversis rebus quàm minimè defecerit.

Non sunt igitur optima Medicamenta quæ magis arcana.

DOMINI DOCTORES DISPUTATURI.

M. Guillelmus Lamy.
M. Petrus Yon.
M. Antonius de S. Yon.
Medicus Regis ordinarius.

M. Claudius de Quantel.
M. Ioannes Robert.
M. Ludovicus Gayant.
Medicus Regis ordinarius.

M. Nicolaus Lienard.
M. Philippus Dosté.
M. Nicolaus Morin.

Afferebat Lutetiæ LUDOVICUS POIRIER Richelæus
A. R. S. H. 1676.

PARISIIS,

Apud FRANCISCUM MUGUET, Regis & Illustrissimi
Archiepiscopi Parisiensis Typographum.